

"Oživio" aerodrom u Tuzli: U junu 12.000 putnika

16/08/2013 21:03 by Administrator

Uspostavljanjem avionskih linija ka Malmeu i Geteborgu u Švedskoj te Bazelu u Švicarskoj, Međunarodni aerodrom Tuzla je u pravom smislu riječi oživio. Samo u junu, prema podacima direktora Envera Jukanovića, tuzlanski aerodrom je imao 12.000 putnika, što je samo godinu ranije bilo gotovo nezamislivo.

"Zahvaljujući partnerstvu s WizzAirom na aerodromu je zaposleno 50 ljudi. Pored aerodroma imamo taxi službu, a planiramo i uvođenje dnevnog autobusa. Riješili smo pitanje vatrogasne jedinice, otklonili prepreke, ali pred nama je puno posla da bi ovaj nekadašnji vojni aerodrom u svakom smislu postao civilni", kaže direktor Jukanović.

Osnivač aerodroma, Vlada TK, pomaže rad, a Jukanović navodi kako bi on bio samoodrživ ako bi dnevno imao po dva leta.

"Znamo kakav je naš potencijal i kakvi su nedostaci. Dolazi nam zima i troškovi blizu 400.000 KM. Za nas to biti novo iskustvo, a nadam se kako ćemo unaprijediti svoj rad u narednoj godini", kaže on.

Do kraja ljetne sezone planira se da usluge tuzlanskog aerodroma koristi 60.000 ljudi, a u narednoj godini zajedno s partnerom WizzAir i 100.000.

"Osim letova u režiji WizzAir s Međunarodnog aerodroma Tuzla se putuje i prema Antaliji. U ljetnim mjesecima ka tom ljetovalištu je otputovalo više od 2.000 putnika", navodi Jukanović.

U budućnosti se očekuje podrška Vlada TK, Vlade FBiH, Turističkih zajednica Tuzlanskog kantona i Federacije BiH, a očekuje se da će i privredni subjekti prepoznati značaj i kapacitet Međunarodnog aerodroma Tuzla i da će iskoristiti njegove mogućnosti.

Izvor vijesti: Klix.ba